

06/10/2003

Kesepakatan OIC atasi isu Palestin, Iraq dinantikan

Generasi 2020

MALAYSIA menjadi tuan rumah Sidang Kemuncak Pertubuhan Persidangan Islam (OIC) ke-10 minggu ini. Menariknya, Malaysia juga pengerusi bagi Pergerakan Negara Berkecuali (NAM).

Pada sidang kali ini banyak masalah dibincangkan baik dari segi ekonomi, sosial, politik dan keselamatan. Antara topik yang menjadi perdebatan hangat ialah pergolakan di Tebing Barat. Isu ini sudah lama dibincangkan, namun nasib rakyat Palestin tidak juga berubah. Mereka terus ditindas rejim Israel.

Tiba masanya, bagi ketua negara Islam bangkit dengan satu suara untuk membantu umat seagama. Sikap pentingkan diri sendiri sepatutnya sudah lama dibuang oleh negara Islam demi kesucian agama ini.

Pemimpin negara Islam atas prinsip kemanusiaan, tidak boleh lagi berdiam diri dan hanya menyaksikan kekejaman yang dilakukan terhadap saudara seagama.

Ini kerana penindasan itu berlaku secara terang-terangan. Jika perkara ini berpanjangan, saya yakin lebih ramai yang akan terbabit dalam peperangan dengan menggunakan tubuh badan sendiri sebagai senjata.

Masalah Tebing Barat mencapai kemuncaknya. Mungkin inilah masanya untuk Tebing Barat dihuni sama oleh pasukan pengaman dari Pertubuhan Bangsa-Bangsa Bersatu (PBB). Jika perlu pasukan pengaman di bawah payung OIC.

Satu resolusi yang dipersetujui oleh semua negara Islam perlu dicapai dalam hal ini. Mungkin pemimpin OIC boleh membantu menangani isu Iraq. Namun jika Iraq perlu pasukan pengaman, Palestin lebih lama memerlukannya.

Jika usul ini dapat diterima baik di PBB, saya rasa kedaulatan PBB kembali diiktiraf. Memang susah untuk merealisasikan cita-cita ini. Semua orang tahu punca ia menjadi susah dan rumit, tetapi kita perlu berusaha.

Seluruh masyarakat harus terbabit dalam hal ini. Sebagai permulaan, kita boleh cuba mendapatkan `undi' menerusi internet atau televisyen. Lebih baik undi ini turut dijalankan di semua negara OIC.

Kita perlu bersatu menangani hal ini, tidak mengira fahaman politik. Jika isu ini dapat diketengahkan di PBB, saya yakin cadangan Perdana Menteri, Datuk Seri Dr Mahathir Mohamad untuk mengurangkan kuasa Majlis Keselamatan akan berjaya.

Saya berharap, sidang OIC kali ini dapat meyakinkan dunia segala kekacauan yang berlaku sekarang berpunca daripada kekejaman rejim Zionis.

GENERASI 2020,
Universiti Tenaga Nasional.